

和寧安邊完山城隍曰啓國伯智異無等錦城雞龍紺嶽三角
白嶽諸山晉州城隍曰護國伯其餘皆曰護國之神蓋因大司
成劉敬陳言命禮曹詳定也○李穡來謁謝 宥恩○戊辰次
漢江邊不豫留四日令巡軍執騷擾人家者杖之以示軍中○
庚午僉長壽來謁謝 宥恩○辛未四方赤祲○命僉書中樞
院事鄭摠製 定陵碑文○乙亥西方赤祲○地震○日珥○
下旨都評議使司曰各道緣化僧徒稱賫 親押願文誑誘兩
班百姓者一皆禁止○全羅道按廉使金希善報都評議使司
曰外方無通曉醫藥者乞於各道遣醫學教授一員每於界首
官置一醫院選聚兩班子弟以為生徒擇其識字謹厚者定為
教導令習鄉藥惠民經驗方教授官周行講勸定屬採藥丁夫
以時採取藥材依方劑造有得病者隨即救療○是月修前朝
行征東省改號大平館○二月丙子朔昧爽 上命駕知中樞
院事鄭曜賁都評議使司啓本來自京城以 顯妃未寧平州
鳳州等處又有草賊 聞 上不悅曰草賊有邊將報欺何者